

Berkenaan modal, memang modal perlu di dalam perniagaan, tetapi bagi ahli-ahli perniagaan yang sebenarnya sudah menjalankan perniagaan mengambil modal dengan bantuan-bantuan wang pinjaman umpamanya kerana meneruskan usahanya yang berjalan sudah barang tentu bererti menambah bebanan sebab bunga dari wang yang dipinjam itu apakah akan dapat ditutupnya dengan faedah yang didapatnya daripada usahanya. Kerana banyak daripada ahli-ahli perusahaan menjalankan usahanya kadar kekuatan dan daya upaya sahaja terutamanya pula mereka takut bahawa wang orang tatkala masuk di tangannya sudah sebagai wangnya sendiri – terus dibelanjakannya sehingga terjadilah, kerana kekurangan penyelidikan, bermilion-milion wang redha tidak menghasilkan seperti apa yang dikehendaki oleh tujuan asalnya: membantu iktisad orang-orang Melayu.

Sebab itu yang utama untuk membantu perusahaan-perusahaan Melayu yang ada, yang sedang berjalan usahanya ialah sebagaimana yang disebut oleh Raja Musa bin Raja Mahdi di dalam Majlis Mesyuarat Federal baru-baru ini bahawa yang utama ialah jauhkan persaingan perusahaan Melayu dengan perusahaan-perusahaan bangsa-bangsa lain dengan memberikan tender-tender yang tertentu yang boleh dibuat mereka. Kalau tender-tender umum, ertinya tender-tender bersama dengan perusahaan lain sudah tentu perusahaan asing akan lebih cergas dan sudah barang tentu tidak ada peluang orang-orang Melayu mendapatnya.

Banyak lapangan yang boleh diberikan kepada perusahaan-perusahaan Melayu untuk melayakkan mereka bersaing dengan perusahaan asing asakan mereka dilorongkan mendapat kerja-kerja yang dibuat oleh kerajaan – pada mulanya dengan jalan “kota”.

Kita beri sahaja satu misal yang dapat kita alami sendiri, umpamanya mengenai buku-buku Bahasa Melayu yang digunakan oleh Kementerian Pelajaran atau buku-buku lain-lain bahagian dari kerajaan. Kalau diselidiki tidak ada sebuah pun buku-buku itu yang dicetak oleh perusahaan-perusahaan Melayu pada hal hari ini, usaha-usaha Melayu di dalam percetakan, dengan tenaga mereka sendiri sudah pun boleh melayakkan diri mereka membuat kerja-kerja yang boleh dibandingkan dengan perusahaan asing sama ada yang di Singapura atau di Pulau Pinang. Kepada mereka, kita yakin, tidak perlu lagi diberikan pinjaman modal untuk membesarkan usahanya tetapi yang perlu bagi mereka ialah pekerjaan yang boleh

diberi oleh kerajaan supaya kelak melayakkan mereka boleh bersaing dengan perusahaan percetakan bangsa asing, kalau kerajaan tidak mengendahkan perusahaan mereka maka janganlah diharap mereka akan dapat menandingi perusahaan lain bangsa.

Orang ramai Melayu sendiri sekarang telah menyedari hal ini sambil bertanya: “Mengapa buku-buku Melayu yang digunakan di sekolah-sekolah kerajaan tidak dicetak dalam percetakan Melayu?”

Ini hanya sebagai satu contoh – ada banyak lagi perusahaan Melayu yang sedang berjalan yang boleh dibantu dengan memberi kerja-kerja yang boleh memberi bantuan kepada mereka untuk hidup dan untuk maju dan ini lebih selamat daripada berikan pinjaman modal, kerana modal ertinya memudahkan bagi suatu masa jangka pendek tetapi salah raba akan menyusahkan dalam masa jangka panjang!

\* \* \*

#### **Di Mana Tugas Kita?**

Apabila mulai dijalankan sahaja rancangan mengadakan Sekolah Menengah Melayu maka kesulitan yang pertama yang dihadapi olehnya ialah: Kekurangan buku-buku pelajarannya.

Ertinya sekolah-sekolah boleh dibuka, buku tidak ada. Dengan ini, timbullah suatu pertanyaan: Apa bolehkah Kementerian Pelajaran ataupun Dewan Bahasa mengadakan buku-buku untuk sekolah itu dalam masa segera? Soal ini tentunya sulit untuk menjawabnya kerana kalau usaha ini hanya dijalankan oleh mereka kemungkinan mengadakan buku-buku itu tidak akan dapat diadakan sekalipun dalam masa tiga atau empat tahun – sekiranya hanya dijalankan oleh Dewan Bahasa dan Pustaka sahaja.

Untuk menyelenggarakan ini kita suka mengambil perhatian kepada salah satu keputusan Kongres Bahasa yang ketiga dalam menghendaki tertubuhnya Dewan Bahasa dahulu ialah: Dewan Bahasa hendaklah dari satu ke satu masa bekerjasama dengan penerbit-penerbit Melayu.

Kita tidak sekali-kali mengatakan bahawa tidak ada kerjasama di antara Dewan Bahasa dengan penerbit-penerbit Melayu di seluruh Persekutuan Tanah Melayu ini. Kita mengakui ada kerjasama itu tetapi kerjasamanya hendaklah dirapatkan

lagi lebih erat kerana dari semenjak ini, kita yakin, bahawa kerjasama yang rapat belum diadakan iaitu dengan cara Dewan Bahasa menganjurkan kepada penerbit-penerbit Melayu mengadakan buku-buku untuk kegunaan di sekolah-sekolah sama ada menengah atau rendah dengan memberi bahan-bahan yang perlu untuknya yakni apa jenis dan kandungan tiap-tiap buku yang dikehendaki.

Dengan cara ini, dengan cara kerjasama ini kita yakin bahawa akan banyak buku-buku yang diterbitkan yang boleh disesuaikan dengan kehendak Kementerian Pelajaran apabila bahan-bahan yang dikehendaki di dalam sesuatu buku itu diberikan. Buku-buku seperti ini patut digalakkan dibuat sungguhpun yang demikian ini harus hanya bagi sementara jua sehingga pada satu masa dapat diadakan buku-buku yang lebih sempurna dan tersusun.

Kita menganjurkan supaya Dewan Bahasa dan Pustaka memerhatikan lebih berat dalam kerjasama ini dan memberikan bahan-bahan buku-buku itu supaya penerbit-penerbit Melayu mencari jalan mengadakan buku-buku yang dikehendaki. Sekiranya perusahaan-perusahaan Melayu tidak diberi peluang dan perusahaannya dipertahankan sudah barang tentu perusahaan penerbit-penerbit Melayu akan hancur sebab usaha-usaha dari lain-lain bangsa telah pun mengeluarkan modal-modal yang besar dalam menerbitkan buku-buku Melayu dengan menggunakan tenaga bangsa Melayu bersama-sama dengannya. Sebelum bahaya yang besar ini tiba maka sewajarnya Dewan Bahasa dan Pustaka yang dibina mulanya dari Kongres Bahasa dijalankan oleh bangsa Melayu haruslah memerhatikan supaya usaha bangsa Melayu di dalam menjalankan persuratan Melayu kelak tidak diperalat bangsa lain sehingga menjadi tukang buat dan tukang tenun sahaja.



*Sebuah masjid yang indah di Labuan – tempat menunaikan bakti dan ibadah kepada Allah – marilah beramai-ramai menunaikan bakti!!!*